



Selasa, 22 Oktober 2024
Ogen: Lukas 8:1-3



"Anggota Tim"



Nats paksa tenengta enda nuratken kerna diberu-diberu si nampati Jesus, istilah si gundari e me tim funding-donatur (kalak si mereken/nyisihken ertana/buatenna lit guna nampati); enterem kalak si terlibat guna nampati dahin pelayanen Jesus rikut pe ras ajar-ajarNa. Piga-piga kalak si tersurat lako nampati dahin pelayanen Jesus e me: diberu-diberu si nggo ipepalem Jesus arah pinakit bage si nggo iselamatkan Jesus lako mpelawes kuasa setan-iblis, Maria (si igelari Magdalena), Johana ndehara Kusa, Susanna bage pe diberu-diberu si la tersinget gelarna. Kerina diberu-diberu e ikut muat bagin lako nampati pelayanen Jesus radu ras ajar-ajarNa. Sada hal si perlu jadi usihen man banta arah diberu-diberu e me keriahen ukurna lako jadi bagin i bas dahin pelayanen Jesus. Diberu-diberu si enggo nggejapken kemalemen ate rikut pe nggo ngaloken keselamatan arah Jesus Kristus nari. Jesus ras ajar-ajarNa si sepuluhdua kalak dahiken dahin pelayanen guna meritaken Berita Si Meriah, tentuna dahin pelayanen enda memerlukan dana si melala guna ncukupi keperluan (perpangan 3 x sada wari bage pe keperluan sideban) ajar-ajar. Tim enda kerina mereken dirina rikut pe ras dana guna nampati dahin pelayanen Jesus. Si menarik ka arah teks enda, maka lit tim si la tersinget gelarna tapi mereken penampat guna dahin nehken Berita Si Meriah. Tim Funding-donatur-anggota tim iperluken kal i bas nampati ndahiken dahin lako nehken Berita Si Meriah, misalna majekken Rumah Pertoton ingan ersembah bage pe nuriken Berita Si Meriah; melala dana si iperluken gelah banci pajek sada Rumah Pertoton. Seh kal iperlukenna donator-donatur lako banci ikut muat bagin guna nampati majekken Rumah Pertoton. Moria-moria GBKP e me tim funding-anggota tim Tuhan Jesus masa gundari enda; ikutlah kita tetap muat bagin i bas dahin pelayanen; banci saja gelarta la inget kalak, banci saja lupa teman si isampati kita e lako ngatakan bujur, tetaplal kita bagi diberu-diberu si la tersinget gelarna bas Pustaka.

meriahlah ukurta, ikut muat bagin lako jadi tim funding